

Damain delicts criminals

Grischun: Statistica criminala 2014

DA GION NUTEGN STGIER / ANR

■ **Il dumber dals delicts criminals è sa reducì en noss chantun per 252 cas. Tut en tut èn vegnids registrads l'onn passà 10 085 delicts. Il regress dals delicts criminals grischuns correspunda al trend naziunal.** Ier ha la polizia chantunala cun ses cumandat *Walter Schlegel e Gianfranco Albertini*, il schef da la polizia criminala dal Grischun, preschentà la statistica criminala da la polizia 2014. La situaziun dal total dals delicts mussa en tut ina tendenza plaschaivla. En il Grischun èn vegnids registrads tranter il 1. da schaner ed ils 31 da december 2014 total 10 085 delicts. Quai èn lura tuttina 252 damain che anc il 2013. Da quella realitad èn sa mussads ventiraivels tant *Walter Schlegel* sco er *Gianfranco Albertini*. La part pli gronda èn acts chastiabels cunter il cudesch penal svizzer, numnadamain 8196. L'onn precedent eran quai dentant be 8183 cas. S'augmentà è er il dumber dals delicts da violenza grevs e quai da 18 sin da nov 39. En ils ravugls famigliars hai dà en cumparaziun cun l'onn 2013 gist 21 cas dapli ed il dumber total munta a 200 cas. Persuenter èn ils delicts cun blessuras levas sa reducids da 162 sin 126 cas.

Tranter 20 e 30 onns

Da las personas inculpadas dattan ils umens tranter 20 e 30 onns sco er quels da 40 fin 49 onns spezialmain savens en egl a la polizia. Sco quai che la sta-



Walter Schlegel (san.), il cumandant da la polizia chantunala, e Gianfranco Albertini, il schef da la polizia criminala dal Grischun han preschentà la statistica criminala da la polizia 2014.

FOTO G. N. STGIER

tistica grischuna da criminalitad mussa datti dentant grondas differenzas aifer las regiuns. Il grad da criminalitad è il pli aut a Cuira e conturn, a Tavau,

sco er en la Mesolcina. A la testa dals delicts figureschan anc adina enguladitschs cun infracziun e quai èn tuttina bunamain 3000 cas. La quota da

scleriment en quest sector giascha tar stgars 28%, l'onn avant era quella tar 21%. L'enguladitsch cun infracziun vala sco delict da massa cun ina ener-

gia da massa, ha ditg *Gianfranco Albertini* ier als meds da massa. Quels delicts chaschunan fitg blera lavur da retschertga e d'inquisiziun, ha ditg il schef da la polizia criminala dal Grischun. Da tut ils acts chastiabels cunter il cudesch penal svizzer ha la polizia chantunala dal Grischun sclerì 34,6% e l'onn precedent eran quai be 31,4%. Tar ils delicts cunter il corp e cunter la vita sa chatta la quota da scleriment tar 93% ed uschia bunamain sco anc l'onn avant.

Popolaziun malsegira

Ils enguladitschs per lung da las axas da transit ed er a la periferia hajan laschè daventar malsegira la populaziun. La polizia haja reagì cleramain sin la situaziun d'enguladitschs cun infracziun agravada. Augmentadas sajan vegnidas las controllas, la preschientscha da la polizia en quellas regiuns e las stentas da retschertga, ha menziunà *Walter Schlegel*. Ils success da l'onn passà conferman er che las stentas da la polizia hajan dad ir, ha ditg il cumandant da la polizia chantunala. Il dumber dals delicts na possia betg vegnir controllà sulettamain da la polizia. Gist en cas dals enguladitschs cun infracziun saja la polizia er fitg dependenta da la populaziun, ha manegia *Gianfranco Albertini*. Il schef da la polizia criminala ha appellà a tuts da sa proteger, dad avair curaschi civil, quai vul dir dad esser alerts e dad annunziar directamain a la polizia sch'i capita insatge dubius.